



## SpeLa 23: Miir sinn baraad

Kelti – Kuschelsogge – Katzewösch –  
s isch kai Zyt fir Gfröörli hösch!  
S Borpmenee isch läär, s wird mer halber drimmlig;  
d Woonig – ooni Haize – isch scho halber schimmlig.

Fir kielti Stadie in Katar länggt s Gäld allimool,  
gwise Lyt isch s, glaub ych, ganz aifach z wool.  
Der Depp in Russland – nit dä im Weschte –  
Wott ney Land, uff alli Keschte.  
Hoffetlig duet dä Pfoschte glyy roschte,  
sunscht kasch bald kai Oel und Gas me boschte.

Bi uns deerfsch jo au nimm alles mache,  
iiberleggsch dir bi jedem Uff-e-Schalter-drugge,  
ob de nit lieber wotsch e Kerzli entfache  
und fir d Weermi mit Frinde änger zämmezrugge.

Mir Pfeschtlibinder, mit gschtrigge, warme Sogge,  
kenne alli zämme um e scheen Fyyrli hogge.  
Mit LaLiBu, Gitarre und am Stägge e Wurscht,  
singe mir und nämnen e Bierli gege der Durscht.

*Kumbaya my Lord, kumbaya.  
Kumbaya my Lord, kumbaya.  
Kumbaya ma Lord, kumbaya.  
Oh Lord, kumbaya.*

Mit Wasser syyferlig Umgang dryybe,  
dermit au jo no ebbis foorig duet blyybe.  
Anderscht nutze wänn mer das raare Guet,  
Strom generiere us dääre wärtvolle Fluut.

Wasser spaare Uan-Ou-Uan:  
Finger ewägg vom Wasserhaan!  
Wenn d ainewääg sottscht durschtig syy,  
steggsch dy Grind dirägg in Rhyy.

Numme dusche, nimm baade; gheersch vo z overscht oobe.  
Bim Dusche brinzle, verdegel, sett me hit au no loobe.  
Zem Wasser spaare wird empfoole,  
uffen Aabee drey Gschpääni z hoole.  
En oekologishi Alternative, wo sich loont:  
E Bängelschyssi, die sinn mer alli scho gwoont.  
Fir s WC git s au im LaLiBu e bassendi Melodyy,  
drum stimme mer alli mit em Sir Francis yy:

D Schyssi isch verschtopft im erschte Stogg.  
D Schyssi isch verschtopft im zwaite Stogg,  
D Schyssi isch verschtopft im ganze Huus.  
Drum schysse si zum Fänschter us.

Zum spaare derfsch du mit dym Kaare,  
trotz Stromaatriib, nimm ummeffaare.  
Wandere isch drum d Devyyse,  
muesch also au kai Auti lease.  
Der ÖV isch ys au scho z vyyl.  
mir kemme zfuess an jeedes Zyyl.

Nit BuLa, PfiLa sondern SpeLa,  
drum muesch ys an der Fasnacht gsee ha.  
Eb Glepfer, Marschmellous oder Schlangebroot,  
mir schmaisse uff s Fyyrli alles wo goot.  
Näb em Drummle, Pfyffe und Stägge schwinge,  
dien mir drum au Pfadiliedli singe:

*Ains und Zwai und Drey und Vier und  
Fimf und Säggs und Siiben Acht.  
E Huet, e Stogg, e Räägerschirm und  
Vorwärts, Ruggwärts, Sytwwärts. Zämme!*

Mit Fuulaar umme Hals und uff der Biire e Huet,  
fyyre mer unseri Freyhait und s goot ys guet.  
Zält uffstelle – kai Brobleem,  
Fasnacht mache – wunderscheen!  
Iiber Häring stolbbere mit der Karte vor der Schnure –  
du y glaub, do goot s doch nit duure.

Mir wandere dur Basel, drey Daag lang am Stigg,  
Pfyffer und Drummmler mit Schwaissperle im Gnigg.  
Vo Boschte zue Boschte hett s Lyt mit schwarze Hiet,  
die wingge so komisch, drum singe mer säll Lied:

*Oh lägg du mir, oh lägg du mir,  
oh lägg du mir am Dschööbbli.  
Oh rutsch du mir der Buggel ab,  
und bloos du mir in d Schue.*

Ganz ooni Strom; mir gniesse die drey Dääg.  
Mir maine, das isch der richtig Wääg.  
Mir Pfadeese und Pfaader, mir kenne s ooni,  
drum leer s au du, goppelooni!  
Jetzt khan er kho der gross Stromusfall.  
Allewyl baraat! – Uff jeede Fall!

---

D Ladäärne-Uusstellig uff em Minschterplatz und  
d Waage- und Reggwisye-Uusstellig bi dr Kasäärne  
sin vom Määntig znacht bis am Mittwuch demoorge!

Druggerey: Werner Drugg & Medie AG